

ESPAINIAKO KONSTITUZIOAREN URTEURRENA



PABLO S. QUIZA

Milaka lagun bildu zituen atzo EHk Durangon, Espainiako Konstituzioaren aurka.

Euskal Herriak konstituzio propioa lantzeko «borondatea» duela dio EHk

Manifestazioa egin zuten atzo Durangon, duela 22 urteko «hautu zuzena» nabarmenduz

Joseba Arruti | DURANGO

Euskal Herriarrok taldeak hiru mila lagun inguru bildu zituen atzo Durangoko kaleetan euskal konstituzioaren alde egindako manifestazioan. *Euskal Konstituzioa orain!* zioen pankartarekin abiatu ziren 17:30ean, Liburu eta Disko Azoka biltzen duen gunearen aurretik. Bertan EHko hainbat buruzagi bildu ziren, besteak beste, Arnaldo Otegi, Josu Urrutikoetxea, Tasio Erkiñia, Fernando Barrena, Joseba Permach, Isa Mandiola, Jone Goirizelaia eta Rufi Etxebarria.

Manifestazioak Durangoko hirigunea zeharkatu zuen ordu erdian. Ibilbidean zehar independentziaren, euskal presoen, demokraziaren, Euskal Herriaren askatasunaren eta ETaren aldeko oihuak entzun ziren. Gainera, ikurrin mordoa eraman zuten manifestariak, eta bidean zehar presoen aldeko *solidarioekin* egin zuten topo. Helmuga Santana plaza izan zen, eta bertan Joseba Permachekek egin zuen berba.

«Aurrera doa Euskal Herrian abian jarritako prozesua»

Permachekek berba hauek esan zizkien kazetariei: «Pozik egon behar dugu Euskal Herrian abiatu den prozesuak aurrera



PABLO S. QUIZA

EHren manifestazioaren amaierako ekitaldia.

ANEKDOTA

Argindarrik gabe, ekitaldi politikorik ez

EHk ekitaldi politikoa zeukan iragarrita atzo Durangon, manifestazioaren amaieran. Baina Permach hitz egiten ari zela, bi kaputxadun Santana arkura igo ziren pankarta bat jartzera eta, kableren bat zapalduta edo, argindarrik gabe utzi zituzten bozgorailuak eta ezin izan zen ekitaldia burutu.

egiten duelako, eta Konstituzioaren egunean milaka lagun lanera, klaseetara, euskaltegietara... joan delako, egun normala izan delako azken finean. Horrek argi eta garbi adierazten du herri hau pixkanaka bere etorkizuna eraikitzen ari dela, horretarako desobedientziaren bideetik Espainiako Konstituzioari

eta bertako legalitateari aurre eginez».

Herri Batasuneko Mahai Nazionaleko kidearen aburuz, «urteetan ezker abertzalea bakarrik egon da Espainiako Konstituzioaren, Gernikako Estatutuaren eta Nafarroako Foru Hobe-kuntzaren aurkako mezuak zabaltzen, eta orain, zorionez, al-

JOSEBA PERMACH

HBko Mahai Nazionaleko kidea

«Batzuk Konstituzioaren erreformaz ari dira, baina afera ez da hori, gure etorkizuna geuk eraikitzea baizik»

derdi politiko guztiak hasi dira horien inguruan egiten euren adierazpen guztiak. Gure iritziz, errealitate horrek islatzen du ezker abertzaleak lortu duela eztabaida politikoa marko honen baliagarritasunaren edo baliagarritasun ezaren inguruan egitea».

«Alderdi politiko batzuk Konstituzioaren erreformaren inguruan behin eta berriro eztabaidatzen ari direla, guk uste dugu benetako afera ez dela hori, baizik eta euskaldunok izan behar dugula gure etorkizuna eraiki behar dugunak, eta, horrekin lotuta, baita gure konstituzioa ere», esan zuen Permachekek.

Bere berbetan, Euskal Herriak bere konstituzioa lantzeko «gogoa, borondatea eta konpromisoa» du, eta bide horretan jarriko ditu bere indarrak ezker abertzaleak.

EB-IU

Konstituzioak «oso aldaketa sakona» behar duela uste du Madrazok

Joseba Arruti | BILBO

Duela 22 urte «frankismo-tik demokraziara igarotzeko izan zuen zubi zeregina» ontzat jo arren, EB-IUk uste du Espainiako Konstituzioa «zahartuta» geratu dela egun, eta «oso sakoneko aldaketak» behar dituela. Javier Madrazoren iritziz, «1978an Konstituzioaren aurka agertu zirenak dira orain bere defendatzaile sutsuenak, eta hori ez da kasualitatea, haren eduki soziala eta deszentralizazio administratiboari buruzkoa hustu baitiote».

EB-IUk hiru ardatz nagusi aipatu zituen euren ustez Konstituzioan egin beharreko aldaketei dagokienez: «Errepublika estatu forma gisa hartzea, estatu federala eratzea eta autodeterminazio eskubi-dearen onarpena» izango lirateke euren erreformaren zutabeak.

Madrazoren esanetan, «Konstituzioak gizartearen zerbitzura egon behar du, eta ez alderantziz; beraz, ezin da esan aldaezina denik». Gainera, «bakea lortzeko prezio politikoa demokrazian sakontzea bada, gustura ordainduko dugu prezio horri», zehaztu zuen.

PP-PSOE estatu ituna

Madrazok gogor salatu zuen aurki PPK eta PSOEkin indarkeriari aurre egiteko sinatuko duten estatu ituna egiteko prozesua: «Itun hori hilda jaioko da. Ezin du fruiturik eman bakearen inguruan, gainera alderdien bazterketan oinarritu delako eta mugak aurretiaz ezarri dituelako». Hala, horrelako itun baten prozesuan «hasieratik egon ez» IU ez zaiola atxikiko adierazi zuen Madrazok: «Platera guztion artean prestatu ez dugunez, eurek bakarrik jatea dute».

Azkenik, datozen egunotan Kongresuan dauden alderdiei «Euskadin bakea lortzeko estrategia partekatua izateko gure ustez behar den gutxieneko proposamena» helaraziko dietela iragarri zuen Madrazok.